



Pou Piblikasyon Imedya: 17/11/2021

GOUVÈNÈ KATHY HOCHUL

GOUVÈNÈ HOCHUL ANONSE INISYATIV 25 MILYON DOLA POU AMELYORE LOJMAN POU TRAVAYÈ AGRIKÒL YO

Nouvo inisyativ la ap kreye ak Fon Lwa Federal CDBG CARES yo pou ede fèm yo diminye pwopagasyon Kowonaviris la, pwoteje mendèv la

10 milyon dola prale nan pwogram sibvansyon lojman sekirize travayè agrikòl yo pou amelyore lojman travayè agrikòl yo

15 milyon dola prale nan yon pwogram prè ki sантre sou lojman travayè agrikòl

Gouvènè Kathy Hochul te anonse jodi a yon nouvo pake 25 milyon dola sibvansyon ak prè pou amelyore kondisyon lojman pou travayè agrikòl yo epi pwoteje sante ak sekirite mendèv empòtan sa. Pwogram Sibvansyon Lojman Sekirize pou Travayè Agrikòl (Farmworker Safety Housing Grant Program) ap finanse reyabilitasyon ak ranplasman lojman travayè agrikòl kalite enferyè ki egziste yo. Sibvansyon yo disponib nan Biwo Renouvelman Kay ak Kominote (Homes and Community Renewal, HCR) Eta NY la atravè finansman Sibvansyon Blòk Developman Kominotè (Community Development Block Grant) Lwa CARES la, ki bay resous pou minisipalite yo amelyore lojman ak enstalasyon kominotè yo pou reponn ak COVID-19 la. Anplis, Eta a sipèvize yon Pwogram Lojman pou Travayè Agrikòl 15 milyon dola, yon pwogram prè renouvlab ki fèt pou amelyore lojman travayè agrikòl yo, kote kiltivatè yo ka aplike pou jiska 200,000 dola pa fèm.

"Nouyòkè k ap travay di pou kenbe fèm nou yo ap fonksyone yo merite lojman ki gen sekirite, ki garanti epi ki pa mete sante ak byennèt yo an danje," **Gouvènè Hochul te deklare.** "Anpil nan moun sa yo souvan abite nan lojman gwoupe ki deja gen bezwen reyabilitasyon, epi ak risk COVID-19 la toujou poze, li empòtan pou nou fè travay sa pi bonè ke posib. Gras ak finansman sa, nou ka fè li vin yon reyalite epi asire ke Nouyòkè k ap travay di sa yo gen yon kote ki adapte ke yo rele lakay yo."

Pou Pwogram Sibvansyon Lojman Sekirize pou Travayè Agrikòl yo, minisipalite yo ka aplike pou sibvansyon jiska 1 milyon dola pou sipòte yon fèm oswa gwoup fèm ki gen 5-10 inite lojman ki bezwen reyabilitasyon oswa ranplasman pou abòde pwoblèm tankou risk anviwònmantal, sistèm filtrasyon ki ansyen, epi pou bay ekipman pwoteksyon pèsonèl ki esansyèl tankou mask ak dezenfektan pou men.

Sibvansyon yo dwe benefisye moun ki gen revni ki ba- a modere yo ki gen revni ki egal a 80% Revni Mwayen Zòn nan oswa ki pi ga epi travay la dwe fèt ant 12-18 mwa apre dat yo te bay yo a.

Aplikasyon yo disponib anliy: <https://hcr.ny.gov/cdbg-cares>

Pwogram Lojman Sekirize pou Travayè Agrikòl la konplete Pwogram Lojman Travayè Agrikòl Eta New York la, ki te kreye plis pase 20 lane de sa pou ede fèm yo bay lojman ki sekirize epi ki apwopriye pou anplwaye yo. Se Farm Credit East nan patenarya ak Biwo Renouvelman Kay ak Kominote Eta New York la k ap administre pwogram nan, epi li bay prè san enterè pou finanse amelyorasyon lojman ki egziste oswa konstriksyon oswa acha nouvo lojman pou travayè agrikòl yo. Pwodiktè agrikòl New York yo, ki enkli operasyon fui, legim, sè ak pepinyè, cheval ak lèt yo kalifye pou aplike.

Senatè Kirsten Gillibrand te deklare, "Travayè agrikòl New York yo te travay san rete pandan tout pandemi an pou kontinye met manje sou tab nou yo. Nou dwe yo sa pou asire ke kondisyon lavi yo pa mete yo nan plis risk pou yo ekspose ak COVID-19 la. M ap kontinye goumen pou pwoteje travayè agrikòl yo epi kenbe kominote agrikilti New York la djanm."

Manm Kongrè Sean Patrick Maloney te deklare, "Travayè agrikòl yo se yon pati enpòtan nan ekonomi nou an epi yo merite lojman ki sekirize pou yo antre apre yon jounen travay difisil. Sibvansyon sa yo p ap sèlman ede travayè agrikòl nou yo, men agrikiltè ak tout kominote agrikòl yo nan Hudson Valley a tou. Mwen espesyalman fyè ke finansman sa ap yon kòd sovtaj pou ti kiltivatè ki t ap fè fas ak gwo chaj finansye otreman pou amelyore lojman pou travayè agrikòl yo."

Manm Kongrè Adriano Espaillat te deklare, "Travayè agrikòl yo se manm esansyèl nan kominote nou yo epi ki enpòtan anpil nan medèv peyi a. Mwen felisite Gouvènè Hochul pou anons jodi a pou nouvo inisyativ ki pral ede amelyore lavi travayè agrikòl yo ki te riske lavi yo pandan wos pandemi an pou bay manje ak resous pou fanmi yo nan tout kominote nou yo. Mwen kontan anpil pou wè kijan finansman ke mwen te ede sekirizaatravè sibvansyon Blòk Developman Lwa CARES la pral itilize nan eta nou an pou bay envestisman ki nesesè pou lojman pou travayè agrikòl New York yo ak fanmi yo."

Vis Prezidan Farm Credit East ak kowòdinatè pwogram NYS FWH la, Mike Haycock te deklare, "Pwogram Lojman pou Travayè Agrikòl Eta New York la te yon zouti ekstraòdinè pou fèm k ap chèche konstui oswa amelyore lojman pou travayè agrikòl yo. Farm Credit East kontan pou fè patenarya ak Eta New York sou pwogram sa yo k ap ede fèm yo ak travayè yo depann de yo alafwa."

David Fisher, ki se Prezidan Biwo Fèm Agrikòl New York (New York Farm Bureau, NYFB), te deklare, "Kiltivatè New York yo bay gason ak fanm k ap fè travay esansyèl yo nan fèm nou yo. Sa enkli pou bay lojman ki sekirize pou anplwaye nou yo.

Pwogram sibvansyon ak prè ki anonse jodi a yo ap ede kiltivatè yo konstui nouvo lojman epi modènize enstalasyon yo. Biwo Fèm Agrikòl New York la gen anpil tan ap defann Pwogram Lojman pou Travayè Agrikòl la, e mwen felisite Gouvènè Hochul pou efò kontini li epi paske li mete lajan disponib pou fèm ki te nan ban devan ap pwoteje travayè agrikòl yo pandan pandemi an."

RuthAnne Visnauskas, ki se Komisè Renouuvèlman Kominote ak Kay Eta New York, te deklare, "Travayè agrikòl yo bay yon sèvis ki gen anpil valè lè yo asire ke Nouyòkè yo gen aksè a manje fre, ki gen nitrisyon. Yo merite pou viv nan lojman ki nan pri abòdab ki bay diyite ki kenbe yo an sekirite epi an sante, espesyalman pandan n ap soti nan pandemi COVID la. Inisyativ ki anonse jodi a pral byen sèvi pou ede kiltivatè yo amelyore kondisyon lojman pou travayè yo, epi diminye pwopagasyon kowonaviris la. Mwen vle remèsyè kòlèg travay mwen nan Depatman Agrikildi ak Mache (Department of Agriculture and Markets) Eta NY la ak zanmi nou yo nan Farm Credit East pou patenarya yo ak nou sou efò enpòtan pou envesti nan fèm New York yo epi diminye difikilte sou mendèv enpòtan sa."

Komisè Agrikilti Eta a, Richard A. Ball, te deklare, "Pwogram Sibvansyon Lojman Sekirize pou Travayè Agrikòl la ak Pwogram Lojman pou Travayè Agrikòl Eta New York yo se resouse enpòtan, k ap pèmèt kiltivatè nou yo envesti nan lojman ki modènize oswa nouvo lojman pou anplwaye yo. Nan kad travay nou sou Gwoup Konsilitatif sou Mendèv Agrikòl la (Agriculture Labor Advisory Group), ki te fòme plizyè ane de sa, eta a te mete aksan sou enpòtans amelyorasyon lojman pou sekirite ak byennèt travayè pa ane ak sezonye yo ki esansyèl pou pote manje nan kominote nou yo. Gras ak Depatman Renovasyon Kay ak Kominote Eta New York ak patenarya li ak Farm Credit East, kiltivatè nou yo gen yon opòtinite inik pou gen aksè nan finansman ki tèlman nesesè nan domèn sa epi mwen ankouraje yo anvizaje aplike pou pwogram yo."

Pou plis enfòmasyon sou Pwogram Sibvansyon Lojman Sekirize pou Travayè Agrikòl la ale sou: <https://hcr.ny.gov/cdbg-cares#farmworker-housing-grants>

Pou plis enfòmasyon sou Pwogram Lojman pou Travayè Agrikòl la ale sou: <https://hcr.ny.gov/farmworker-housing-program-fwh> oswa FarmCreditEast.com.

###